

平樂府志卷三十七

藝文部四

文

賦役

明都御史楊芳

國初之制百十戶爲里丁糧多者爲長每里十甲首戶百卽周人比長閭胥之職也圖分十里輪年應役十年而周公賦公甸皆里正董之一年在官九年在家故其賦易供而其民常逸歷年漸久徵輸之制名色繁多曰額辦者以物料爲貢有定額者也曰雜辦者藩司承部不時徵派無定額者也

平樂府志

卷三十七

藝文

文

一

名色今日曰奉計部明日曰奉繕部今日曰奉司文明日曰奉部文今日正編明日曰加編頭緒絲棼里正茫然莫知其措則不得不多方以應之至於差役其繁滋甚見役里甲賦錢於官曰綱銀曰辦銀有司復攝之令直日供具無名之征紛然四出卽百緡不以抵數窮鄉小民白首不識官府雇人代直月費數十金里甲大苦及編均徭又復取盈其最重者莫如庫子夫甲廩保諸役上司行部使客下車下程夫役之費急於星火而郡邑長吏諸餼務咄嗟立辦大都廩編一兩費可百餘金庫子編一兩費可數百餘金至兵役繁興衙蠹蝟集

編派彌多民不勝弊破貲鬻產逃亡者相踵矣自一條編之法行之兩淞諸藩多倣而行之其法合一邑錢糧分爲四差一曰里甲則課程公費之類也一曰均徭則柴薪皂役之類也一曰兵欵則弓兵民壯之類也通陸夫馬之類也一曰兵欵則弓兵民壯之類也通括四差之數每歲幾何每米一石酌銀幾何一切顧役官給之費而民不與焉然後編爲成書刊爲由帖上無以飾憲司之觀下撫以掩閭閻之目貧富適均出入有廣雖聖喆復生莫之易也至若補偏救弊之權則當責之有司

鹽法

明都御史楊芳

漢元狩四年幹山海之貨置鹽官二十八郡而蒼梧居其一唐劉晏始行常平鹽官自爲市歲儲錢百餘萬緡而軍餉官祿皆仰給焉官之鬻鹽自此始宋時二廣之鹽皆屬漕司量諸州歲用而給之廣東地沃民饒商人輻輳故行商鹽廣西廣莫而凋瘁食鹽無幾商不樂趨故官爲搬運粵西之行官鹽自宋然矣元平章也兒吉尼爲禦紅巾賊議磬石城守禦遂捐俸貿海鹽獲倍稱之息版築功成民不告勞粵至今賴焉明尚書唐驛以長沙寶慶衡永郴道各郡食鹽甚難廣東積鹽有餘可撐運到廣西以入湖廣各郡上從其議於是東鹽始

達於湖廣矣隆慶初都御史殷正茂平古田後議增營伍而左藏稱詘因請於朝効元也兒吉尼故事而綜理加焉官鹽商鹽各居其半其利息歲可二萬左藏自是稍贏矣然行官鹽後重絕私販商人造爲浮言以撼當道總督都御史劉堯誨衡人也遂極言官商之非撫臣郭應聘按臣胡宥亦以情聞上下大司農議曰廣西鹽運之議原爲新添兵餉而設一日不可無兵則一日不可無食若西省官運之鹽旋行旋罷兵食俱乏地方坐困咎將誰諉似不可以一時商人之私便而忘地方將來之遠圖也宜從舊議上曰這兩廣都是朝廷地方軍餉比之通商干係爲重這鹽運只若遵照不許再議紛更由是官鹽始通而衆喙少息疏請官鹽百包許帶私鹽十包以優水手使得盡力於狂波巨浪之中酬勞於嚴霜烈日之下耳議者謂私鹽之帶非理郭中丞極力以辯之紛議始息大都首事之人長慮卻顧故其法似寬而行之可久更事之人以剔蠹爲功故其法常嚴而莫必其後夫豈獨鹽筴然哉

行鹽議

令溪 高熊徵

行鹽一事卑職親承憲諭無非裕課便民洞晰各商屬民虧餉病源革目前之陋弊圖經久之良規

無微不燭無慮不周矣然考古鹽法之善無過劉晏其理鹽也不過於出鹽之鄉置鹽戶所煮之鹽鬻於商人任其所之至江嶺間去鹽鄉遠者轉官鹽於彼貯之必俟商絕鹽貴然後減價鬻之故鹽得常平今各縣有各縣之引則不得任其所之也專行官引禁絕私鹽則非俟商絕鹽貴然後減價鬻之也鹽何以得常平且晏之理財必委士類今商皆債賈惟利是罔卽僉士商亦豈盡得其人不得其人則徒滋紛擾法雖甚善利害仍相等耳查粵西往例每引至桂該銀八兩三錢零今每引止銀六兩六錢三分零耳而昔日之鹽賤引能多銷

今日之鹽貴壅滯不行其故何也蓋粵西自古行鹽之法不論官民商賈但有資本者皆得在東買鹽惟於梧州立廠以權之每鹽一包梧廠納銀三錢平廠納銀一錢二分桂廠納銀一錢七分任其發賣官無考成之責是卽劉晏但鬻於商人任其所之法也故經久無弊康熙元年廣東撫憲以鹽引滯積具題前撫金始行文各處計口授鹽於是各府州縣俱有定額彼時吏有賢不肖民有巧拙其賢有司雖奉上法亦恤民艱開報丁口酌可而行不肖有司專事逢迎務爲苛索乳哺之子盡行開報民之巧者互相隱匿丁多而派鹽最少民

之愚者無所覆藏丁少而派鹽反多其始之立法各處設埠按額行銷未嘗不善而其究也可行鹽之處得鹽反少發賣既速別處之鹽不得擅賣民苦淡食其山高水峻不能行鹽之處得鹽雖未嘗多而壅滯不行商人交接衣食出其中搬運脚費出其中鹽價日騰民不能買尤苦淡食縣官既畏考成之獲罪又與鹽商多有交於是任商開價按丁發鹽追呼遍及雞豚敲扑盡於閭里民不聊生甚於青苗之害矣厥後不能行鹽地方乃有寧願釀銀銷納乾引聽從商人別處發賣者矣此當日將軍傅在梧日久目擊其弊故特題總商通融銷

引地方官無僉商派食之累而商人盡握利權低昂任意民食貴鹽引額仍滯其弊又有如今日者要而論之有近鹽地方有不近鹽地方私鹽必賤窮苦小民趨賤避貴雖髡刑曰報欲求私鹽之絕不可得也不近鹽地方私鹽既無官鹽又少雖出示嚴禁欲商人之不高擡其價亦不可得也蓋粵西鹽法之弊總在按額行銷而按額行銷之弊總之能行鹽之處苦鹽少鹽價高擡不能行鹽之處苦鹽多欲不派之百姓鹽滯不行則病商且病官鹽而派之百姓則追呼不及病民亦病官何則官有考成故也然今額引既定國課不容虧損古之

良法豈能復行救時之政但如憲諭華去東商令
總商實開折引之費脚價之費其餘溢費與各陋
規盡行查革總於梧廠令計其到鹽之多寡定其
價值之低昂任其通融各處發賣而不能行鹽之
地派幫折引之費庶幾國課無虧公私兩便然而
總商盡握利權又實難其人矣要之有治人無治
法是在大宗師擇人而任之耳卑職生斯長斯稔
知其中情事仰承明問具見愛民諄切至意敢不
備摠所見以對惟采納行之

三賢祠記

粵稽有宋以言謫昭州者吾得三賢焉華陽范公
祖禹常州鄒忠公浩澹菴胡公銓載諸史乘可考
也今廣西之平樂卽古之昭州也而三公之名迄
今炳炳與桂嶺榮山爭高足以摧奸鋒而定國是
豈泛泛逐時低昂者伍哉廣西右叅政鄒君輓卽
忠公十五世孫也嘉靖丙戌夏六月行部至昭乃
覽舊帙搜往蹟愀然挹公於羹墻間惟舊有祠在
龍興觀之東鞠爲茂草久矣爰卽鳳凰山之隙捐
己俸爲祠以祀鄒公范公居中胡公右焉蓋三公
之學術旣同其氣節又同流風餘韻百世無斲廟
食茲土於法爲宜亦所以揚前喆之休立人臣之
軌興仰止之心而振習俗之敝旬宣之職顧不當

爾耶瞻拜之餘聿符厥志於是郡守龍子大有請紀其事遂書其畧爲來者諗焉

靈濟廟記

明 陳應春

五將有神廟食昭郡舊矣靈濟宋季勅額也始自廣遷於昭潭祀於廣運王之左右相傳宋開禧間封侯爵端平間加仁濟等號兩賜璽書大抵稱侯能興雲雨驅疫病護舟楫有惠於茲土者甚厚郡人報祀惟謹奔走祈賽無虛日歷歲滋久威靈益炳固宜與山川相爲悠長也萬歷戊寅予奉天子命飭兵府江時方班師以休養撫綏爲念而賊首張公祿廖金濫時復鼓眾內訌剿之則免脫撫之

則狼躡材官策士徒撫膺而莫誰何余與韓叅戎計撫剿皆不適用惟司擒之便韓叅戎唯唯禱於侯必擒此而朝食卒用間者生縛張酋五十人又縛廖賊父子六人及其黨二百五十人凱歌以旋羽纛載揚余自視孱劣匪神之力不及此於是肅牲譔詞告成事於侯而拜賜焉祭典能禦大災則祀捍大患則祀張廖煽禍積有歲年與神爲謀駢首就戮禦災捍患孰有大於此厥功章明宜受大享俾有憑托而宣其烈也顧廣運神居中而五將列於左右且雜以十正妃崇祀弗專瀆濶不雅余心病焉亟爲侯別圖之祝史以告卜更徙不可卜

前後寢不可乃就廟貌而增飾之鳩工庀材陶甃塗黝奐然翼然加閎麗矣遷十正妃祀於祠後之左以別嫌釐舛庶幾哉正祀典崇報祀神妥而人安之矣廟成韓叅戎請余記其事昭示永久余不揣蕪陋叙其大都如此云

太尉忠順武烈公廟祀

宋趙明

公名炳字文虎倜儻不羈風度偉岸卓爾有雄傑之表性好讀書經史無不涉獵與族兄煥同庚少相善叔延鐸有識鑒每器重之常曰二子皆吾家千里駒也大吾門者其斯人乎年二十累應舉不中適有柳州寇犯境謂兄煥曰文武兩途俱進身

路苟有補於國家皆可爲也兄以文顯吾以武進遂率童僕當先拒賊官兵乘之而進寇退却不敢犯境州郡名聞補授橫貴廉三州都巡檢使累任邊陲以勞績守欽州值交趾犯邊公與諸將扼敵於抵棹寨交戰賊勢猖獗大軍失利諸將退却公獨以身當之自旦至暮麾下皆散遂爲所害朝廷惜其死而嘉其節贈安遠軍節度使忠順侯勅所在立廟迨仁宗皇帝朝儂賊作逆時承平日久州郡無所禦一百日夜順流破七郡將壓賀城守職倉皇失措計無所出忽夢見侯當先破賊後儂寇退却其州果全皆侯之陰佑也賊散郡守訪問乃

知公之靈驗如此遂聞於朝再贈太尉忠順武烈公今鰲岡嶺側廟是也往來所求多應公四子皆以蔭補將仕郎獨維瞻維蕃並登甲第維蕃景泰五年戊寅第六十三人楊置榜維瞻慶歷二年壬午第四甲七十二人呂溱榜皆歷郡守子孫寓居淮淞今襄湖二州毛氏乃其後也

忠佑廟記

宋毛鏗

嘗謂一氣流行萬物化生惟人得其秀而靈正而直而聖神則最秀最靈而嚴正者也若郡有神曰陳侯忠佑廟者乃本郡人肇迹於隋唐卓犖倜儻不詭隨於俗當時爲郡庠生隱居求志樂道不仕

及其沒也爲神靈顯凜然若存蓋鍾光嶽之氣靈之最者吾郡介於楚粵之交民彝雜處維時盜賊鋒起煽殃賈禍聞神之名罔不起敬起畏落魄喪膽不攻自破吾民得免於兵者非神之力歟且吾郡僻居萬山盤結之中嵐瘴疫厲每歲亢旱綿雨失時凡有所禱其應如響是蓋世歷千紀功在羣黎神之威德直可謂萬世不磨矣先朝嘉泰封顯應侯今上前嘉熙二年加顯應孚佑侯至是有司又以事間伏蒙恩旨加顯佑廣惠侯隆名徽號照耀古今聖德神庥播聞遐邇故被其澤者思其澤與時序相爲循環感其恩者誦其恩與人心相爲

悠久而惠之所流者廣矣神其不昧益加庇護上不負朝廷報賜之禮下以慰臨賀厚望之情庸非斯世斯民之幸乎愚也荷神默庇躬逢其盛故因人心喜談而樂道之僉以爲可命石工鐫於勅命之下以永其傳云宋淳佑七年立石撰文

募修朱將軍墓引

袁景星

將軍朱姓諱旻如號宗臣粵之臨桂人也壯歲登武科目儀壯魁偉膂力過人猿臂善射尤精流星拳棍之技時丁明季流賊劫掠湖南逼近全灌將軍時官守備奉征蠻令守禦粵境頗著戰功又援剿各賊累官至總兵封鎮西將軍守平樂順治庚

寅冬定南王左翼鎮馬蛟麟破龍虎關乘勝入境將軍提一旅之衆接戰失利還城率衆拒守將軍以平城半臨灘水易守半在鳳山易攻城中兵不滿千乃分部曲守其易而自守其難我兵置雲梯鼓噪登城將軍卻擊之自辰至午我兵稍退將軍坐鳳凰樓少息忽見城南有戴紅纓者將軍知城不守乃星騎還署盡殺妻妾子女出坐廳事集將士無一至者左手握將軍印右手拔刀自刎其頭未斷者不盈寸左翼鎮怒將軍拒戰屠平城兵民死無□類三日始封刀招徠百姓曳城內屍身擲於江時部曲蕭伯雄冒死收將軍骸藁葬於城北

已毀周王廟內邇來蓋四十五年矣今鎮署乃鄉先生王縈山舊居卽將軍盡節處也協鎮文將軍敬將軍之烈久欲修將軍墓因致語將軍弟朱孝廉星如速之來平會葬意良善也郭都闔懷甯陳遊戎子勲亦屢爲余言遷延數歲而朱孝廉不果來甲戌春正五日友人嚴明千謂余曰蕭伯雄去歲已老死而朱將軍墓尚未修人壽非金石恐我輩去後而忠臣之骨竟與土壤同朽也明千勝國忠臣嚴中堂秋治先生令嗣先生與將軍同時將相先後同死國事請之固至性所不容已非尋常功果邀福之舉也夫自古無不亡之國天下無不

死之人國亡而有忠臣亡有餘榮人死而爲忠義死有餘烈殺者全其名而非嫌死者完其節而無怨食祿死難士人盡事君之理主辱臣死國家獲養士之報此墓一修表網常之儀型申天地之正氣其有關於世道人心豈淺鮮哉墓成斯文卽將軍之墓誌也卽將軍之列傳也情至文生余亦何辭

祭三烈文

失名

嗚呼烈女兮正靜端方襟韜櫝而含輝蘭在溪兮自芳天材完節兮金百鍊而堅剛雖闔儀素有嫺兮實秉植之貞良父櫬搖搖兮莫返故鄉何彼羣

盜兮肆志鋒鋌恨不殲此讎兮豈辱犬羊高風激
烈兮率二母以偕亡精誠貫日兮勁氣凌霜野有
悲吟兮伏臘歲將表厥宅里兮神隨在而洋洋余
攬轡西粵兮柄司激揚嘉爾英烈兮載新斯堂嗚
呼世難一死兮矧裨綱常雖丈夫或中奪兮奚女
婦一門三烈之煌煌天綱立兮地維張曹娥並遊
兮追二妃與翱翔倘歸嬪而賦栢舟兮曷讓共姜
生爲奇男子兮必齊馨於睢陽山蒼蒼兮水泱泱
爾爲不磨兮百世有光采蘋一奠兮景行靡亡

平樂啓建三壇記

慕國典

社稷封內山川之祭三代諸侯之禮也卿大夫行

之則僭自封建廢而郡縣守令秩亞於卿大夫若
其行政治民莫非古諸侯之事有明洪武制令直
省府州縣各立社稷山川風雲雷雨二壇竝厲壇
爲三壇

昭代相沿不改蓋旣以稷配社而又以虞書祭法之
禋六宗者合之望山川且又以工厲侯厲之意通
之爲郡邑厲賓天神而饗地祇衛生而卹死其禮
備矣大矣國典嘗以幕僚攝職方面刀竿筐篚日
不暇給顧竊有志於聖王之六經大法謂當有以
進乎古者不宜以俗吏自限迨受事平樂春秋二
戊及二時厲祭躬親行禮趨蹌執事於荒郊宿芥

間無壇壝規址心不以爲然舅氏張損持先生貽以贛州府志載興國修舉社稷山川風雨碑記知古制未始不可復於今載考通志宋張南軒氏作堯山灘江二壇記山川之宜壇昔已行之廣右而南軒爲宋大儒其足遵法無惑也禮制近郊之南爲風雨山川壇西社稷壇北厲壇平郡南逼灘江舊祀二壇皆於郭之東北今不改遷從所便也郡守任其貲邑令董其役身旣爲之創不得不以難者自予也伐石甃磚挑土之役率里人赴功而悉酬其值貧瘠之民并不責以力也荒徼殊鄉民獠雜處歲一不收刼掠奸宄於是乎繁卽平居無事

癘疫之所時行或不悉遂其休養生者無所卹死者無所依則奔走羣望以爲此燹黎請命者神鬼之權視中原上國而更有重焉又越俗尙機鬼多淫祠往往祭非其鬼而先王禮制乃棄勿問國典不敏惟

國家典禮恪恭奉行儼規制以肅其觀聽動之以精白畏懼之誠而陰消其獷頑妄作之習非惟自異於俗吏而化誘荒陬之術亦於是寓焉是役也始於康熙乙亥五月成於七月糜金錢若干悉勒於碑陰

凡物之成而不毀者雖以觀遊覽勝之未猶且愛其名而善繼焉矧夫先賢靈宇懷馨襲芬忠義足感人心而風流所示足輝映殊域者乎平樂三賢祠祀宋龍圖學士范公祖禹寶文學士鄒忠公浩工部侍郎胡患簡公銓祠舊在龍興觀東久廢明嘉靖丙戌鄒忠公十五世孫輓官右叅朱輻行部搜佚剔遺爲重建祠於鳳凰山麓左叅政祝君鑾爲記載於平樂舊志矣夫美蹟之易堙官其土而闔茸棄者無論卽有勤勉爲政之心補偏救敝顧往往於茲獨後務焉謂非於民有實裨也豈知綱維世宇頑廉懦立風教所關當先務之爲急乎歲

壬子希芳承乏守樂川凡於政理方敷施事事秉大中丞公訓迪雖懼庸陋弗承而莫敢或後維茲三賢祠宇廢不卽復斯亦政之闕如也今得奉大中丞公命而修補之爰度吉地於城內分司街構木聚陶選日授工不數月而祠落成繼目今有修勿墜庶幾春秋禋祀尙賢有典三公之靈實憑矣豈惟高楹飛薨收一亭一閣之勝哉展也君子德音不已三賢諒迹直心言出譴從後先一轍而偶然寄躅之地儀型俎豆夫且弗諼休光與昭潭仙嶺並峙也若居官而能被德於茲土則惠心之孚美名不世其澤潤而山仰者又當何如耶其亦可

以風世也耶用不辭蕪鄙而記修舉之顛末

平樂府江重建浮橋記

陳希芳

平樂古昭州治也灘樂二水所匯下距昭平控梧江而上接桂林陽朔孔道四出顧水則一舟而徑達陸則孤洲斷汊蹊徑錯雜行者或多紆阻却步焉利濟之術非藉爲政者相其宜而左右之曷善乎郡江浮橋爲平廠榷稅處當陸要衝郡民之出入樵迹市擔之便郵足之經絡繹下上非此則莫能徑渡者然舊故無橋春夏潦水時至卽捐設浮渡而江面深濶迅濤若雷浩瀚冲突小舟一葉爭趨競捷往往有風波覆溺之險以爲民憂康熙五十五年知府事慕君國璵仿桂林水東江橋制捐貲創造運舟三十有二繫以鐵絙中覆以板作浮橋以濟民并募橋夫以司啟閉蓋不特府廠鎖鑰謹嚴民實陰蒙其利矣歷年遞更時有修葺顧松材未良且日爲水所嚙蝕外飾而空其中鮮不敝且毀焉雍正十年四月奉

恩命來守茲土甫數日會大兩江水忽夜漲建瓴下注濤怒風烈猝不及瞬瀕江竹房多有隨流漂去者而橋船亦胥潰失無存希芳乃量捐已貲人予一金易竹重構俾窮者無失居之戚至船橋建復則工巨費繁方躊躇默計弗敢以能事讓前人且

重違撫軍惓惓爲民德意也爰亟請借支一歲養廉之半營材直聚工役時修作迄冬而成浮江映水朱紅翼如較舊觀爲增麗寧復有褰裳却顧臨江而歎厲揭之爲病者乎夫乘輿濟人孟子謂其惠而不知爲政而成梁除道周禮先焉然則浮橋之成舉援溺利涉之心以造舟爲梁是誠惠政之一端修廢舉墜之莫可後者繼之君子庶幾觀焉而有以推暨於無窮也用爲記以永諸石

周何二仙姑碑亭記

鍾嶽秀

鳳凰山去城東里許勢聳形尊卽舊邑茶城之少祖也山後有谷名鳳凰窩坦然中虛廣可數十畝

循徑曲折而上烟霞繚繞林木繁陰舊傳有周何二姓仙姑同飛升於此往往於風靜露明之候常見并肩連袂嘯傲於長松怪石之窟昔人神其事立壇於山巔水旱災浸有求輒應己酉旱太甚安州陳邑侯諱景洙者憂民之憂靡神不舉聞二仙姑靈應沐浴齋成率邑中士民步行虔禱而賈勇先登者預向壇前扳茅剪棘隨於爐下拾得玉遣餌一枚陳侯聞之愈肅然起敬祈禱甫畢甘兩隨來邑侯念二仙姑之靈擬築亭於谷中會陞天保令去乃捐俸資命生等相地勢庀工選材神人協謀鼎建碑亭於斯山之半

平樂府志卷三十七

平樂府志

卷三十七 藝文 文

十七